

IJAMBO RYA NYAKUBAHWA MADAMU JEANNETTE

KAGAME

MU IHURIRO RYA 11 RYA UNITY CLUB

INTWARARUMURI

Intare Conference Arena, Ku wa 26 Ukwakira 2018

**Ba Nyakubahwa mu Nzego Nkuru z'Igihugu cyacu,
Bavandimwe Ntwararumuri,
Batumirwa Bacu bahire,
Abarinzi b'Igihango,
Namwe Rubyiruko, Bana bacu,**

Muraho neza!

Mbanje kubashimira uyu mwanya twafashe, kugira ngo tunganire ku nsanganyamatsiko yacu: ***Ndi Umunyarwanda, Inkingi yo kubaka amahoro mu muryango.***

Munyemerere dufate uyu mwanya, twongere twifurize ikaze Abanyamuryango bashya, twungutse muri uyu muryango wacu.

Ndashimira imyanzuro yavuye mu matsinda, abatuganirije mu gitondo, cyane aba bana bacu bemeye kudusangiza ukuri k'urungano. Umukoro mwaduhaye tuzafatanya kuwuvugutira umuti!

Nifuje ko twongera kwibukiranya '**Ndi Umunyarwanda**', n'icyo igamije kugira ngo bidufashe kujya twisuzuma neza.

Bajya bavuga ngo: "**Niba wifuza kwihuta genda wenyine. Ariko niba wifuza kugera kure gendana n'abandi**".

Urugendo rwacu nyuma ya Jenocide, rwadusabye kugendera hamwe, mu bumwe, tutirengagije ibikomere biterwa n'amateka yacu.

Iyo tuza kugenda buri wese ukwe, tuba dufite ibice birenze uko tungana! Amahitamo yacu rero, niyo yatumye dushobora kwicarana uyu munsi, tugaha umurongo igihugu cyacu, tukarebana mu maso tutishishanya, tukubura amaso twemye, tukareba umugabane wacu n'isi muri rusange.

U Rwanda, sicyo gihugu cyonyine gifite *ingirwamoko* zitandukanye baduhaye iwacu!

Hari ibindi bihugu biyafite kandi y'ukuri ndetse bakagira na byinshi bibatandukanya. Nyamara bamwe muri abo-abo ni abashishikariye iterambere n'amahoro arambye mu bihugu byabo, uzasanga akenshi bakomera ku gihugu cyabo na identity yabo, bigasumba ibindi byose byabatandukanya, bikabafasha kugera kure.

Babishobozwa kenshi, n'uko haba harabanje gushyirwaho umurongo wa Politiki muzima. Maze amategeko akagaragaza umurongo ntarengwa, ku muntu wese wakwirengagiza inyungu z'igihugu cyangwa watatira **“identity”** y'Abenegihugu.

Ndi Umunyarwanda yacu yo, si amahame abantu bashyiraho gusa ngo yubahirizwe, ahubwo ni uburyo bw'imibereho, imitekerereze n'imikorere – **mode de vie**.

Umukuru w'Igihugu cyacu yarabitwibukije, mu Ihuriro ryacu ryo mu 2014 aho yagize ati:

«Ibigize Ndi Umunyarwanda bivugwe buri munsu. Ariko icyangombwa kurushaho: duhaguruke, dutangire tubishyire mu bikorwa, bibe umuco, bibe ibituranga bya buri munsu mu kubaho kwacu.»

Ntibyari byoroshye, kugenda urugendo rutugeza aho buri wese mu bacu abasha kwivugira koko ati « ***Ndi Umunyarwanda !*** »

Umwanditsi witwa Sen¹ mu gitabo cye yise “***Identity and Violence***”, yagize ati:

“A strong and exclusive sense of belonging to one group can in many cases, carry with it the perception of distance, and divergence from other groups”.

Yashakaga kwerekana ko rimwe na rimwe, kwizirika ku isooko yawe gusa, cyangwa aho ukomoka, bigutera gusobanya n’abandi, kandi mugomba kujyana niba ushaka kugera kure koko!

Murumva ko dukwiriye kubanza gukira ibikomere ubwacu, kugira ngo dukize abato, tubahe umurage mwiza.

¹ Sen, Amartya (Winner of the 1998 Nobel Prize in Economic Sciences), 2006 (p1), Identity and Violence, the Illusion of Destiny.

Uko duhererekanya ibikomere n'ubudasa bw'u Rwanda, bigera no ku rubyiruko rwacu.

Urubyiruko rwatuganirije rwagarutse ku byo umuhanga witwa Marianne Hirsch² **mu gitabo yise 'The generation of the postmemory'** avuga:

La notion de "postmémoire" désigne la relation que la "génération d'après" entretient avec le traumatisme personnel, collectif et culturel subi par ceux qui l'ont précédée, avec des expériences dont elle ne "se souvient" que par le biais d'histoires, d'images et de comportements, au milieu desquels elle a grandi ».

Igihugu cyacu gishyiraho Politiki nziza, kandi tukita ku kuyitoza ababyiruka. Imwe mu nzira izadufasha

² Marianne Hirsch - La notion de "postmémoire" désigne la relation que la "génération d'après" entretient avec le traumatisme personnel, collectif et culturel subi par ceux qui l'ont précédée, avec des expériences dont elle ne "se souvient" que par le biais d'histoires, d'images et de comportements au milieu desquels elle a grandi. Mais ces expériences lui ont été transmises si profondément et avec tant d'émotion qu'elles semblent constituer une mémoire en tant que telle. Comme je la conçois, la connexion avec le passé que je définis comme postmémoire ne s'opère pas au travers d'une forme particulière de remémoration, mais d'un investissement imaginaire, d'une projection et d'une création.

kubigeraho, ni uguharanira gusigasira amateka yacu, tukayakomeraho, tukayatoza n’abakiri bato, nabo bakazayahererekanya n’abazabakomokaho.

Kubimenya kandi tukabizirikana, ni ko kuba ***Mukuru.***

Bavandimwe Ntwararurumuri,

Twahanganye n’ibihe bigoye, bifite ingaruka z’igihe kirekire ku bana bacu. N’ubwo tutahindura amateka, hari byinshi twamaze gusobanukirwa, ariko na none ibisigaye ntibizikemura.

Ni inshingano z’umuyobozi gukora *urugendo* rwo kwakira amateka yacu, akiyemeza kubaka u Rwanda. Ariko ntagomba kugenda wenyine.

Ni inshingano ye na none gufatanya n’abo ayobora, kugira ngo nabo, babashe gutera intambwe yo kubana neza n’amateka yacu, bityo babashe kureba inyungu z’Abanyarwanda n’u Rwanda mbere ya byose.

Gukomeza kugaruka ku muryango, mu gaciro kawo no mu bibazo biwugaragaramo, bifite ishingiro kuko umuryango ari umufatanyabikorwa mu miyoborere, no mu imibereho y'Igihugu.

Rubyiruko, Bana Bacu,

Hari byinshi mwarebesheje amaso y'abana, ubu bibaremereye. Hari n'ibyo mwabonye bikababera umutwaro; ndetse hari n'ibyo mutaciye iryera ariko bibabera umuzigo. Hari bamwe muri mwe musa n'abibuka ibyo mutazi, kuko mwari bato cyane.

Ndifuzaga guhumuriza abato bagizwe imfubyi na Jenoside. Nigeze kubabwira ko iyo umuntu abarebye, ababonamo icyizere ku buryo utatekereza ko mwakomeretse. Abamaze iminsi bakurikira urubuga rwitwa ***Humans of New York***, mwabonye inkuru ivuga uko Umukuru w'Igihugu cyacu yigeze kuganiriza abarokotse jenoside, ababwira ko Igihugu cyabasabye ibikomeye kandi bakemera.

Mwarakoze kubyumva kandi muri bato. Muhumure ababyeyi turahari, tuzakomeza gufashanya mu rugendo rwo kudaherwanwa mwatangiye.

Rubyiruko bana bacu, mwese mukeneye kwitabwaho, buri wese agaherekezwa mu ntambwe ye agezeho.

Turabibijeje!

Twebwe nk'abakuru, tuzabaherekeza mu nyota n'umuhate mufite wo gushakira umuti ibibazo twibaza, n'icyo dukora ngo *Ntibizongere*.

Ibi bizabafasha namwe gufasha abandi, cyane cyane ko tugiye kugera mu gihe cyo kwibuka no kwibohora ku nshuro ya 25!

Imyaka 25 mu buzima bwa muntu no mu mateka yacu ni igihe kitari gito. Tuzaba twinjiye mu kindi cyiciro cy'urungano. Dukwiye no kwishimira ko tuzaba tumaze imyaka 25, dufite abana bakuze batitirirwa amoko, kuko Politiki yacu yahisemo Ubunyarwanda. Aka gakoni rero mugakomeze hatazagira udusubiza inyuma.

Uyu munsu, rero mumenye ko nta gihemu mufitiye Igihugu. Uwari we wese washaka kubarebera muri iyo shusho, ntimukamuhe uwo mwanya, mukomeze kwiyubakira u Rwanda. Mukoreshe amahirwe twahawe n’ubuyobozi bw’Igihugu cyacu, murushaho gushakisha icyazana amahoro arambye – uko ni ko gukira nyako. Iryo naryo ni ishami rya “**Ndi Umunyarwanda**”.

Nifuje gusozza iri jambo nkoresheje ubutumwa bukubiye mu ndirimbo y’Umuhanzi, **Nyakwigendera Cassien Twagirayezu**³.

Yagize ati:

Umuntu nyamuntu akunda amahoro

Akayifuriza na bagenzi be

Ahora ashaka icyamuteza imbere

Ahora yamagana uburyamirane

³ Cassien Twagirayezu, ni umuhanzi wavukiye I Mushubi mu Karere ka Nyaruguru, yize mu Kigo cy’Abafite ubumuga I Gatagara. Iyi ndirimbo yayihimbye mu myaka ya za 1990. Yakoraga mu ruganda Socorwa, yaje kwicwa azize Jenocide. (<https://www.youtube.com/watch?v=sq5tDK9cdws>)

Umuntu nyamuntu si umwe bose bishisha

Si umwe urenganya, si n'umwe uriganya

Umuntu ni Nyamutima ukunda abandi

Mu mirimo ye yitwaza umutimanama

Yirinda icyamusiga ubuhemu

Ntabwo yironda ntarondaronda

Ng'uwo umurage bana b'u Rwanda

Urwo runana rukwire Afrika yacu

Iyo mpumeko yuzure ituze mu isi yose.

Buri wese mwifuriye kuba umuntu nyamuntu.

Ndi Umunyarwanda izatworohera kuyimika, kandi ibe isooko y'amahoro mu miryango, igihugu cyacu, Afrika n'isi yose.

Murakoze!